

Ексапостиларий, глас 2: Свят Господь Бог наш. [Трижды.]

Стихиры на хвалитех 4, глас 2:

Днесь содержит гроб Содержащаго длáнию твáрь,/ покрывает камень Покрывшаго добродéтелию небесá:/ спíт Живот, и ад трепéщет,/ и Адам от уз разрешáется./ Слава Твоему смотре́нию,/ íмже совершив все упокоение вéчное,/ даровал еси нам, Боже, // всесвятое из мертвых Твое Воскресение.

Что зримое видéние?/ Кое настоящее упокоéние?/ Цáрь веков, Иже страстию совершив смотре́ние,/ во гробе субботствует, новое нам подая суббóтство./ Тому возопиим: воскресни, Бóже,/ судяй земли, яко Ты царствуеши во вéки, // неизмерную имея и велию мíлость.

Приидите, видим Живот наш, во грóбе лежáщъ,/ да во гробех лежáщия оживíт./ Приидíte днесь, Иже из Иуды спяща зряще,/ пророчески Емú возопи́им:/ возлег уснул еси, я́ко лéв,/ кто воздвигнет Тя, Царю?/ Но востани самовлáстно,/ давый Себе о нас во́лею, // Господи, сла́ва Тебé.

Глас 6:

Проси Иосиф тело Иисусово/ и положи е в новом своем гробе:/ подобаше бо Ему из гроба,/ яко из чертога, проити./ Сокрушивый державу смерти/ и отверзый врата райская человеком, // Господи, слава Тебе.

Слава, глас 6:

Днешний день тайно/ великий Моисей прообразоваше, глаголя:/ и благослови Бог день седмый./ Сия бо есть благословенная Суббота./ Сей есть упокоения день,/ вонъже почи от всех дел Своих Единородный Сын Божий,/ смотрением еже на смерть плотию субботствовав:/ и во еже бе, паки возвращься Воскресением,/ дарова нам живот вечный, // яко Един Благ и Человеколюбец.

И ныне, Богородичен, глас 2:

Преблагословена еси, Богородице Дево,/ воплощшим бо ся из Тебе ад пленися,/ Адам воззвася,/ клятва потребися,/ Ева свободися,/ смерть умертвися, и мы ожихом./ Тем воспевающе вопием:/ благословен Христос Бог, // благоволивый тако, слава Тебе!

Славословие великое.

Священник же облачается во всю священническую одежду и, окадив плащаницу трижды, идет под плащаницею со святым Евангелием окрест храма, певаему Трисвятому.

По Трисвятом же, став пред царскими враты, священник глаголет: Премудрость.

И мы тропарь, глас 2 единожды [многажды]:

Благообразный Иосиф/ с древа снем Пречистое Тело Твое,/ плащаницею чистою обвив// и благоуханьми, во гробе нове покрыв положи.

И глаголем тропарь пророчества, глас 2:

Содержай концы, гробом содержатися изволил еси, Христе, да от адова поглощения избавиши человечество и, воскрес, оживиши нас, яко Бог Безсмертный.

Слава, конец. И ныне, весь.

Таже прокимен, глас 4:

Воскресни, Господи, помози нам и избави нас имене ради Твоего.

Стих: Боже, ушима нашими услышахом, и отцы наши возвестиша нам.

Пророчества Иезекиилева чтение. [Глава 37, ст. 1 – 14.]

Бысть на мне рука Господня, и изведе мя в дусе Господни, и постави мя среде поля: се же бяше полно костей человеческих. И обведе мя окрест их около, и се многи зело на лица поля, и се сухи зело. И рече ко мне: сыне человекь, оживут ли кости сия? И рекох: Господи Боже, Ты веси сия. И рече ко мне: сыне человекь, прорцы на кости сия, и речеши им: кости сухия, слышите слово Господне, ее глаголет Адонай Господь костем сим: ее Аз введу в вас дух животен, и дам на вас жилы, и возведу на вас плоть, и простру по вам кожу, и дам дух Мой в вас, и оживете, и увесте, яко Аз есмь Господь. И прорекох, якоже заповеда ми Господь. И бысть глас внегда ми пророчествовати, и се трус, и совокупляхуся кости, кость к кости, каяждо к составу своему. И видех, и се быша им жилы, и плоть растяше и восхождаше, [и протяжеся] им кожа верху, духа же не бяше в них. И рече ко мне: прорцы о дусе, прорцы, сыне человекь, и рцы духови: сия глаголет Адонай Господь: от четырех ветров прииди, душе, и вдуни на мертвыя сия, и да оживут. И прорекох, якоже повеле ми: и вниде в ня дух жизни, и ожиша, и сташа на ногах своих, собор

мног зело. И рече Господь ко мне, глаголя: сыне человекь, сия кости весь дом Израилев есть, тии бо глаголют: сухи быша кости наша, погибе надежда наша, убиени быхом. Того ради прорцы, [сыне человекь], и рцы к ним: сия глаголет Адонаи Господь: ее Аз отверзу гробы ваша, и изведу вас от гроб ваших, людие Мои, и введу вы в землю Израилеву. И увесте, яко Аз есмь Господь, вегда отверсти Ми гробы ваша, еже возвести Ми вас от гробов ваших, людие Мои: и дам дух Мой в вас, и живи будете. И поставлю вы на земли вашей, и увесте, яко Аз Господь: глаголах, и сотворю, глаголет Адонаи Господь.

Прокимен, глас 7:

Воскресни, Господи Боже мой, да вознесется рука Твоя, не забуди убогих Твоих до конца.

Стих: Исповемся Тебе, Господи, всем сердцем моим, повем вся чудеса Твоя.

Апостол к Коринфянам, зачало 133:

Братие, мал квас все смешение квасит. Очистите убо ветхий квас, да будете ново смешение, якоже есте безквасни: ибо Пасха наша за ны пожрен бысть Христос. Темже да празднуем не в квасе ветсе, ни в квасе злобы и лукавства, но в безквасиих чистоты и истины.* Христос ны искупил есть от клятвы законныя, быв по нас клятва: писано бо есть: проклят всяк висяй на древе: да в языцех благословение Авраамле будет о Христе Иисусе, да обетование Духа примем верою. [* Галат., зач. 206.]

Аллилуия, глас 5: Да воскреснет Бог, и расточатся врази Его, и да бежат от Лица Его ненавидящии Его. Стих: Яко исчезает дым, да исчезнут, яко тает воск от лица огня. Стих: Тако да погибнут грешницы от Лица Божия, а праведницы да возвеселятся.

Евангелие от Матфея, зачало 114: Во утрий день, иже есть по пятце: Конец: С кустодиею.

Таже ектения: Рцем вси: и Исполним утреннюю молитву нашу:

Такожде и прочая, яко обычно.

И отпуст.

И бывает целование плащаницы: певцы же поют стихиру, глас 5:

Приидите, ублажим Иосифа приснопамятнаго, в нощи к Пилату пришедшаго и Живота всех испросившаго. Дажь ми Сего страннаго, Иже не имеет где главы подклонити: даждь ми Сего страннаго, Егоже ученик лукавый на смерть предаде: даждь ми Сего страннаго, Егоже Мати, зрящи на Кресте висяща, рыдаючи вопияше и матерски восклицаше: увы Мне, Чадо Мое! Увы Мне, Свете Мой и утробе Моя возлюбленная! Симеоном бо предреченное в церкви днесь собысться: Мое сердце оружие пройде, но в радость Воскресения Твоего плач преложи. Покланяемся Страстем Твоим, Христе: покланяемся Страстем Твоим, Христе: покланяемся Страстем Твоим, Христе, и Святому Воскресению.

Первый же час поется в притворе: третий же час, шестый и девятый поются вкупе просто в притворе с блаженными во свое время.